

REZIMEI

Podržanih projekata kroz Fond Mensur i Jasmina Alić

1. JZNU Dom zdravlja Tuzla

JZNU Dom zdravlja Tuzla ima 67 timova porodične medicine, od čega 12 područnih ambulanti. Navedene ambulante se trenutno zagrijavaju putem uglja i na drva te direktno zagađuju okoliš. Nabavkom Inverter klima, zagrijavali bi ambulante (Breške-Dokanj, Požarnica) električnom energijom te bi se smanjila emisija štetnih gasova, ali bi se i popravio položaj i uvjeti rada za zaposlenike i pacijente navedenih ambulanti. Ovaj projekt ima za cilj smanjenje zagađenja zraka kroz prelazak na ekološki prihvatljivo zagrijavanje ambulanti u lokalnim zajednicama Dokanj-Breške i Požarnica. Planom je predviđena nabavka i ugradnja ukupno 4 inverter klima uređaja u tri ambulante čime će se eliminirati potreba za zagrijavanjem pomoću uglja i drva. Ključne prednosti projekta: Smanjenje emisije štetnih gasova gdje će se prelaskom na energetski efikasne uređaje smanjiti emisija zagađujućih materija koje nastaju prilikom sagorijevanja uglja i drva. Projekt podržava korištenje čistijih oblika energije i doprinosi poboljšanju kvaliteta zraka u zajednicama. Očekivani rezultat ovog projekta je zdravije i čistije okruženje za stanovnike, kao i postavljanje standarda za energetski odgovorno zagrijavanje javnih prostora.

2. NG EKOuzDAH

Cilj ovog projekta je podizanje ekološke svijesti i uključivanje lokalne zajednice u očuvanje okoliša kroz niz edukativnih i praktičnih aktivnosti. Planirane aktivnosti uključuju: Edukativne radionice u školama i zajednici, s naglaskom na teme kao što su reciklaža, održivi razvoj i očuvanje prirodnih resursa; Volonterske akcije čišćenja koje će omogućiti građanima da aktivno doprinesu poboljšanju lokalne životne sredine; Promotivne kampanje, uključujući distribuciju letaka i vođenje online kampanja za širenje informacija o projektu; Snimanje dokumentarnog videa kako bi se prikazali rezultati aktivnosti i dodatno podigla svijest o ekološkim pitanjima; Očekuje se da će ove inicijative rezultirati povećanjem ekološke svijesti, unapređenjem izgleda okoliša i jačanjem zajedništva unutar lokalne zajednice. Generalni cilj projekta je ostvariti potpunu ekološku svijest i aktivno sudjelovanje svih građana u zajednici, tako da se svaki pojedinac proglasi ambasadorom zaštite okoliša, što je u potpunosti neostvarivo s obzirom na različite interese i prioritete pojedinaca.

3. UG „Nova ženska inicijativa“

Zbog očekivanog porasta prosječne ljetne temperature u Tuzli se mogu uzgajati razne vrste ljekovitog bilja koje su osnovni sastojak organske kozmetike. Građani Tuzle često kupuju konvencionalnu kozmetiku koja je skuplja i manje kvalitetna od organske. Ovaj projekat prepoznaje priliku da se kroz edukaciju mladih promoviše upotreba organske kozmetike. Udruženje planira organizirati okrugli sto sa stručnjakom,



anketirati 90 učenika i 30 roditelja, te pružiti edukaciju o uzgoju ljekovitog bilja i izradi kozmetičkih proizvoda kao što su melema, micelarna voda i osvježivači prostora. Projekt će učesnicima pružiti vještine i potaknuti ih na pokretanje malog biznisa. Udruženje "Nova ženska inicijativa" već godinama ima uspješnu saradnju sa OŠ Tušanj sa kojom ima sporazum o saradnji i na ovom projektu. Projekt ima za cilj promijeniti stavove mladih i roditelja (90 učenika i 30 roditelja) prema upotrebi organske kozmetike kroz prizmu očuvanja ličnog zdravlja i smanjenja zagađenja, što doprinosi ekološkoj zaštiti. Dodatno, planira se jačanje vještina i kapaciteta mladih u lokalnoj zajednici osposobljavanjem za izradu organskih proizvoda poput melema, micelarne vode i osvježivača prostora. Projekat nastoji povećati interes mladih za dalju edukaciju u ovoj oblasti, čime bi se stvorili temelji za njihovo ekonomsko osnaživanje i buduće poslovne inicijative.

4. Izrada i premijerno izvođenje predstave za djecu "Sretni sat"

Projekat „SRETNI SAT“ je dječja predstava koja nastavlja rad Art teatra u Tuzli, gdje ne postoji institucionalno pozorište za najmlađe. Predstava tematizira društvene poroke poput lijenosti, rata i nedostatka empatije s ciljem edukacije djece. Rad na predstavi počinje 1. oktobra, a premijera je zakazana za 30. novembar 2024. u Bosanskom kulturnom centru TK, koji je koproducent kroz ustupanje prostora. Predstava će kombinovati scensku i filmsku umjetnost, uz tri glumca na sceni i pet na platnu, te uključivati muziku i zabavne, emotivne situacije. Planirane su reprize u Tuzli, TK, BiH i inostranstvu. Projekat je proistekao iz potrebe za dječjim teatarskim sadržajima sa kojima je grad Tuzla i Tuzlanski kanton deficitaran, s obzirom da ne postoje institucionalizirana dječja pozorišta. Sporadični pokušaji umjetničkih udruženja i alternativnih grupa nedovoljni su za zadovoljenje ove potrebe a sadržaj koje nude gostujuće trupe je nerijetko upitnog karaktera. Naša vizija je prerasti u jedno institucionalno dječje pozorište čime bi smo postigli da najmlađi imaju na dohvat kulturni sadržaj primjeren njima. Također, ovim projektom, kao i dosadašnjim, ART TEATAR angažira mlade, nezaposlene glumce da stiču iskustva potrebna za bavljenje ovim poslom.

5. Klub borilačkih sportova Tuzla

Projekat "Sportske igre za djecu" realizovat će Klub borilačkih sportova "Tuzla" u maloj dvorani SKPC Mejdan s ciljem promocije sporta i zdravih životnih navika kod djece. Nedostatak tjelesne aktivnosti, koji doprinosi porastu pretilosti i deformiteta kod djece, prepoznat je kao jedan od glavnih zdravstvenih problema današnjice. KBS Tuzla planira organizovati sportske igre za 200 djece uzrasta od 4 do 6 godina kako bi im pružili priliku da kroz igru i nagrade steknu motivaciju za daljnje bavljenje sportom. Sva djeca koja budu učestvovala dobit će zlatne medalje za uspješno savladane poligone spretnosti, brzine i koordinacije. Generalni cilj projekta je podsticanje djece na fizičku aktivnost, uz jačanje svijesti o važnosti sporta u ranom uzrastu, kako bi se prevenirali zdravstveni problemi.

6. Planinarsko društvo „Konjuh“ Tuzla

Projekat ima za cilj objediniti mlade i starije članove zajednice Grada Tuzle kroz zajedničke akcije pošumljavanja i planinarenja. S obzirom na sveprisutne ekološke izazove, posebno one uzrokovane sjećom šuma i smanjenjem prirodnih resursa, projekt će se fokusirati na obnovu šumskih područja i promociju



zdravog načina života. Aktivnosti će uključivati edukativne radionice o važnosti pošumljavanja i zaštite okoliša, volonterske akcije sadnje drveća, te organizaciju planinarskih pohoda. Osim fizičke aktivnosti, projekt će naglasiti važnost međugeneracijske suradnje i osnaživanja društvenih veza, gdje će stariji moći dijeliti svoja iskustva i znanja s mlađima. Kroz promotivne kampanje, cilj je povećati svijest o problemima deforestacije i važnosti očuvanja prirode, kao i potaknuti zajednicu na aktivno sudjelovanje. Projekt će doprinosti ne samo ekološkoj obnovi nego i jačanju socijalne kohezije, čime će se stvoriti ugodnije i sigurnije okruženje za sve generacije. Cilj projekta je promovisanje aktivnog i zdravog načina života kroz povezivanje mladih i starijih generacija, podsticanje zajedničkih aktivnosti u prirodi poput planinarenja i pošumljavanja, te jačanje svijesti o važnosti očuvanja okoliša. Projektom se teži unapređenju socijalne inkluzije, zdravlja i ekološke odgovornosti svih učesnika, čime se doprinosi kako osobnom blagostanju, tako i poboljšanju životnih uslova u zajednici i zaštiti prirodnih resursa. Javno preduzeće "Šume TK" su uspostavile partnersku saradnju na učešću u pojedinim akcijama pošumljavanja te će obezbijediti lokaciju i sadni materijal za pošumljavanje za realizaciju projekta "Pošumljavanje i planinarenje za sve generacije".

7. Hoću da se igram i želim svoj kutak

Projekat „Hoću da se igram i želim svoj kutak“ ima za cilj obogatiti prostor za djecu u Tuzli, pružajući sigurno mjesto za njihov rast i razvoj, kao i promovisanje sportskih aktivnosti i zajedničkog druženja. Projekt će se realizirati u tri faze. Prva faza obuhvata nabavku i montažu ljučjačke i klackalice uz podršku Grada Tuzla do polovine 2025. godine. Druga faza uključuje nabavku penjalice i tobogana za stariju djecu uz finansijsku pomoć Fondacije tuzlanske zajednice. Treća faza obuhvata montažu igrališta, postavljanje sigurnosne podloge u obliku malča, koji je ekološki prihvatljiv i siguran za djecu. Aktivnosti će uključivati i organiziranje druženja za djecu i penzionere. Svi mobilijari će biti nabavljeni od lokalnih BH kompanija, a projekat je već dobio potrebne saglasnosti od Gradske uprave Tuzla.

8. UG Pčelarsko društvo „Nektar“

U sklopu pčelarskog školskog centra na Ravnoj trešnji – Ilinčica kojim upravlja PD „Nektar“ trenutno postoji montažni objekat (dom) koji je za potrebe održavanja edukacija potrebno proširiti. Svake godine održava se škola pčelarstva koja okupi do 20 polaznika, traje oko 6 mjeseci i održava se svaki vikend. Trenutna prostorija ne odgovara potrebnim kapacitetima niti infrastrukturno omogućava zadovoljavajuće uslove za potrebe ostalih edukacijskih aktivnosti. Škola pčelarstva koju organizuje PD „Nektar“ održava se bez naknade i od strane aktivista, iskusnih stručnjaka i praktičara iz oblasti pčelarstva, veterinarstva, prehrambene tehnologije, kontrole kvalitete, marketinga i prepoznata je kao podloga i prva stepenica u bavljenju pčelarstvom. Škola pčelarstva omogućava tehnički i teoretski osposobljenog samostalnog pčelara koji osim teorijskog znanja stiče i praktično znanje po završetku Nektarove Škole pčelarstva. Adaptirati i osavremeniti prostor za edukaciju u sklopu Pčelarskog školskog centra Ravna trešnja – Ilinčica. Cilj je osigurati adekvatne uslove za kvalitetno upravljanje aktivnostima udruženja, a koje se odnose na održavanje edukacija, radionica, prezentacija, sastanaka i druženja. Osigurati reprezentativno mjesto na kojem se održava jedina Škola pčelarstva, edukacija senzoričara te bazno nastaje prvi BiH med zaštićen oznakom geografskog porijekla.



9. UG Centar za promociju i razvoj „ACTIVUS“

Međunarodni Sajam kafe i čokolade u Tuzli održat će se od 15. do 18. maja 2025. u Hrvatskom kulturnom centru »Sveti Franjo«. Cilj događaja je promocija kafe i čokolade, uz povezivanje izlagača i entuzijasta, te obogaćivanje kulturne ponude Tuzle. Posjetioци će uživati u degustacijama, radionicama, predavanjima i kulturno-edukativnim sadržajima, dok će izlagači moći ostvariti poslovne kontakte. Sajam očekuje velik broj posjetilaca i medijsku pažnju, što će povećati vidljivost manifestacije i doprinijeti promociji Tuzle. Manifestacija ima potencijal da postane vodeća u regionu. Sajam podržava lokalne proizvođače i održive prakse, kao i razvoj ekološki prihvatljivih inicijativa. Realizacija sajma planirana je saznačajnim aktivnostima i popratnim kulturnim i edukativnim sadržajima i manifestacijama, na sajmu će se predstaviti distributeri, ugostitelji, proizvođači opreme, zastupnici, uvoznici i izlagači svjetski poznatih brendova kafe, toplih čokolada, poslastica. Na ovaj način želimo da svi zajedno pružimo priliku za mnoge ugostitelje i hotelijere i druge koji se bave kafom u zemlji i šire, da na jednom mjestu ostvare dobre poslovne kontakte i saradnju. Također ima turistički značaj jer privlači posjetitelje iz drugih gradova i država, promovirajući Tuzlu kao gurmansku destinaciju. Sa dosadašnjim posjetama od preko 10.500 posjetilaca, događaj ima jasnu potrebu i potencijal za dugoročnu održivost u regiji.

10. Narodna i univerzitetska biblioteka Derviš Sušić Tuzla

Cilj ovog projekta je poboljšanje uslova za posjetitelje biblioteke kroz postavljanje parkinga za bicikla i romobile te stvaranje kutka za čitanje na otvorenom. S obzirom na rastuću popularnost bicikala i romobila kao prevoznog sredstva među mladima, projektom će se osigurati adekvatno, sigurno mjesto za parkiranje, kao i prijatno okruženje za čitanje i boravak na otvorenom.

Glavne komponente projekta su parking za bicikle i romobile – nabavka i postavljanje parking ostrva za 10 bicikala/romobila ispred biblioteke, parking bi bio pokriven video nadzorom za sigurnost korisnika i Kutak za čitanje na otvorenom – u suradnji s Razvojnoum agencijom "TRAG" i Službom za komunalne poslove Tuzle, postaviti će se minimalno dvije vanjske klupe i urediti zelena površina pored parka, stvarajući prostor za opuštanje i čitanje. Očekivani Rezultati su: povećana pristupačnost za korisnike – sigurno i pristupačno mjesto za parkiranje podstiče posjetitelje koji dolaze biciklom ili romobilom, podrška čitalačkim navikama na otvorenom – kutak za čitanje doprinosi atmosferi koja promiče čitanje i opuštanje u prirodnom okruženju. Ovim projektom biblioteka pruža korisnicima dodatne pogodnosti i doprinosi zelenijem i ugodnijem javnom prostoru. Narodna i univerzitetska biblioteka Derviš Dušić ima sporazum o saradnji sa Agencijom TRAG iz Tuzle.

11. Razvojni tim Gimnazije Meša Selimović Tuzla

Projekt ima za cilj promovisanje i razvoj muzičkog obrazovanja i kulturnih aktivnosti među učenicima, roditeljima i lokalnom zajednicom i razvoj kreativnosti kod učenika. Postizanje generalnog cilja će se ostvariti putem obezbjeđenja veće dostupnosti i razvoja kvalitetnog muzičkog obrazovanja i kulturnih aktivnosti za 200 učenika (učenici GMS i učenici osnovne škole) i uspostavljanja veće saradnje između škole i lokalne zajednice na zajedničkom promovisanju i razvoju kulturnih sadržaja. U okviru projekta učestvovat će 200 učenika kao direktnih korisnika. Projektne aktivnosti se odnose na osposobljavanje i edukaciju učenika



u oblasti muzičkog i kulturnog stvaralaštva te javnu prezentaciju njihovih muzičkih i kulturnih sposobnosti. Neke od ključnih aktivnosti su edukativne radionice "Melodije između redova: Muzička inspiracija iz knjiga", muzički kviz "Zvuci znanja" i muzičke radionice i probe, koje će koristiti instrumente nabavljene tokom realizacije. Centralni događaj je koncert koji će okupiti učenike, njihove roditelje i goste iz lokalne zajednice, čime će se ostvariti ključni cilj promocije muzike kao alata za lični razvoj i povezivanje zajednice. Kao ključni rezultat projekta očekuje se veći razvoj muzičkog i kulturnog obrazovanja učenika i povećanog stepena zainteresovanosti i saradnje škole i lokalne zajednice. Projektne aktivnosti će dugoročno doprinijeti kvalitetnijem muzičkom obrazovanju i jačanju kulturnog života u školi i zajednici. Praćenje uspješnosti projekta vršiće se kroz povratne informacije, analizu učešća i angažmana, kao i kroz procjenu predviđenih indikatora. Izjavom o partnerstvu Centar za kulturu Tuzla je izrazio saglasnost za partnerstvo sa GMS Tuzla u okviru projekta "Ritam zajedništva".

12. NG Lokalna grupa za razvoj Dobrnja

Da bi parkovi i zelene površine bile funkcionalne od proljeća do zime moraju se najmanje jednom u petnaest dana kositi. Volonteri lokalne zajednice dobrovoljno okupljeni u LGZR Dobrnja vode brigu o okolišu, zelenim parkovima i zelenim površinama u lokalnoj zajednici, međutim imaju ogroman problem sa kojima se suočavaju, a to je nedostatak alata za rad. Volonteri bi obišli prodajne centre i odabrali kosilicu i trimmer za košenje trave. NG Lokalna grupa za razvoj Dobrnja je dobila saglasnost Savjeta MZ Dobrnja da oprema bude smještena u prostorijama mjesne zajednice. Oprema će biti društveno dobro, korištena za košenje trave u parkovima i na zelenim površinama. Planirano je održavanje 10 volonterskih akcija do polovine 2025. godine. Aktivnosti će biti dokumentovane slikama "prije i poslije", te promovirane na društvenim mrežama. Sredstva za rad biće korištena isključivo za održavanje zelenih površina u lokalnoj zajednici Dobrnja.